



## Rapport annual 2018 dalla lavur da GIVENTETGNA CADI

Duront igl onn 2018 ha ei dau enqual midada pertucont la structura da GIVENTETGNA CADI. Vinavon eis ei stau in temps ina malsegirtad pertucont il futur dalla lavur aviarta per nos giuenils e giuvens carschi. Pliras sesidas, ensemes cun il post dil fatg dil cantun, han saviu dar sclariment als responsabels dallas vischnauncas e perschuader dalla necessitad d'in post da lavur da giuentetgna. Las vischnauncas da Tujetsch, Mustér, Medel, Sumvitg e Trun han suttascret la nova cunvegna da prestaziun. Las premissas ein pia dadas per cuntinaur cun nossa lavur. Muort mesiras da spargn ei la plazza dil secretariat vegnida sligiada ed il biro a Trun vegnius serraus. Il pensum da lavur dil post da lavur da giuentetgna dad 80% ei vegnius reducius sin 70%. Jeu sundel vinavon ella plazza sco promotura da giuentetgna e vegnel sustenida da duas dunnas che han surpriu pensums parzials. Madlen Deflorin ha surperiu da tgirar la pagina d'internet e Susanne Strupler ha surpriu la contabilitad. Alla secretaria Olivia Pfister havein nus stuiu dar adia il davos da matg. Ella ei stada naven dalla primavera 2014 nossa perla en biro. L'Olivia ei ina persuna fidada ed jeu hai saviu haver endamen cun ella sur da bein enqual situaziun pli cumplicada. Engraziel fetg Olivia! Igl emprem d'october ei il biro a Trun vegnius serraus. Naven da lu ha ei giu num da s'endrizzar a casa egl aschi numnau «homeoffice». Damai ch'il computer vegl era buca cumpatibels cul WLAN ed era empau plauns havein nus stuiu cumprar in niev. Per saver porscher vinavon las uras d'audienza als giuenils havein nus anflau bunas sligiaziuns. La vischnaunca da Tujetsch metta a disposiziun ina stanza ella tgesa communalia ed ella vischnaunca da Mustér sai jeu esser cheu pils giuenils el local Cons. Duront il temps da scola ei mintgamai la mesjamna suentermiezdi audienza, quei tenor plan publicau.

Enqual project che nus havein realisau igl onn 2018 vi jeu bugen numnar. Adina puspei tematisein nus publicamein il tema mobing. Ils 17 da schaner havein nus organisau a Trun in'occurrenza ed ina discussiun al podi tier quei tema.

L'usitada sera d'ir cun patinas e silsuenter magliar in bien fondue el center AUA VIVA ha giu liug ils 24 da schaner.

Igl emprem da mars havein nus priu las scarsolas ni ils bobs ed essan serendi en Tujetsch per ir cun cazzolas da tgau a far ina scursalada nocturna.

Ils 24 da mars han nos giuvenils giu in aschi numnau workshop cun Mattiu Defuns e cun Sirius. Ils giuvens artists han cantau e fatg il «rappen» ensemens culs giuvenils. Igl ei adina bi che nos artists restan «nos» era sch'els han success local e naziunal.

Nus havein astgau separticipar igl avrel ad in fetg interessant project organisaus dalla baselgia reformada envangelica ensemens cul radio romontsch. 6 da nos giuvenils dalla vischnaunca da Mustér han astgau dar la vusch alla sincronisaziun en romontsch sursilvan ad in film cuort da comic sur da Huldriych Zwingli. Ils 27 e 28 d'avrel essan nus stai a Cuera el studio rtr per registrar. Sur notg havein nus saviu star el hostel Meiersboden a Cuera. Tgi che ha vuliu ha saviu encuir il contact cun la gruppa da Müstair ch'era medemamein envidada da sincronisar en siu idiom la historia da Zwingli.

Ils 23, 24 e 26 d'avrel ei vegniu organisau il cuors da «Babysitting» ella canorta Lumpazi. 5 giuvnas han fatg quei cuors ch'ei vegnius menaus dalla menadra dalla canorta Lisa Giorgio e da mei.

Prevenziun ei tier GIVENTETGNA CADI adina in tema. Ils 8 da zercladur



ha giu liug a Sedrun ina sera pertucont sanadad sexuala cun la pedagoga sexuala Corinne Rietmann da Laax. Jeu sun leda ch'ina dunna dil fatg che

sa romontsch era presenta e ch'ha aschia era saviu rispunder meglier allas damondas dils giuvenils. A quella occurrenza ein 25 giuvenils stai



presents, era da quels ch'ein gia ord scola.

Ils 9 da zercladur ha GIVENTETGNA CADI astgau segidar cun organisar il batten dil disc cumpact «BLENDED» da Dario Hess ed amitgs. Igl ei adina

in special plascher da veser co giuvens talents sesviluppeschan e van lur vias d'artists.

Propi il gaudi havein nus giu la sonda, ils 22 da settember d'ir giul Tessin per ir cun Go Kart. Taxi han menaders ed anteriurs menaders fatg. 14 giuvens han saviu dar gas ellas stortas dalla pista da Go Kart a Locarno.

La survigilanza dils locals da sentupada vegn fatga cun plascher da nossas menadras e nos menaders. Sco usitau ha ei dau in per che han calau cul survetsch ed auters han saviu vegin recrutai. Senza giuvnas e giuvens engaschai per far quella lavur savess GIVENTETGNA CADI buca porscher en tuts treis vitgs mintgamai il venderdis sera la pusseivladad da s'entupar els locals. Igl atun ha in niev menader entschiet cun siu survetsch ella TALINA a Sedrun. Il Flurin Jacomet ha fatg il cuors da menader e selegra da s'engaschar. La TALINA ei buca pli la pli giuvna, quei vul dir las localitads drovan ina renovaziun. Cun sustegn finanzial dalla vischnauca, lavur cumina dils visitaders ed igl agid da geniturslein nus prender a mauns ils proxims onns, tut tenor nossas finanzas, quella renovaziun. 2018 ei vegniu decidiu da renovar il plantschiu su el local da saltar.

Duront il temps d'atun ed unviern purschin nus duas gadas al meins la «halla aviarta». Quei gia la quarta sesiun. Ei fa plascher che dapli giuvenils fan uonn regularmein diever da quella purschida da semuentar,



dar giugs e far sport cun mintgamai dus menaders. Ina ga al meins ei la halla aviarta a Trun ed ina ga al meins a Rabius.

Nossa cumissiun secumpona da: Robert Candinas president dalla cumissiun e delegau dalla vischnaunca da Sumvitg, Mario Hitz delegau dalla vischnaunca da Tujetsch, Iris Lombris delegada dalla vischnaunca da Mustér, Gabriel Venzin delegau dalla vischnaunca da Medel e Kurt Wolf delegau dalla vischnaunca da Trun.

Cuort avon ch'igl onn mondi a fin ha la stizun SPAR da Mustér regalau a nus il daner da Nadal. Cordial engraziament per la summa da frs. 508.- che nus savein duvrar bein per in ni l'auter project duront igl onn 2019.

Engraziel pil sustegn !

Per il project **Agid e sustegn da far pensums** vala buc igl onn calendari, mobein igl onn da scola sco directiva. Bugen dun jeu a Vus in resun dil davos onn.

Pigl onn da scola 2018/19 ei vegniu neginas damondas per far diever dalla purschida da sustener scolars cun lur pensums da casa ni per ulivar fleivlezias parzialas en in ni l'auter rom da scola.

Ei para ch'il basegns ei buca daus pil mument.



Cun in sincer engraziel fetg a tuts che sustegnan nus

*Per GIVENTEGNA CADI: Gabriela Cabalzar-Lombriser, promotura da giumentetgna      Robert Candinas, pres. dalla cumissiun da lavur*